



U OVOM IZDANJU OBJAVILI SMO:

- **Aktivnosti na programu razvoja zajednica**
- **Ideje mladih i građana za primjer**
- **Skupština omladinske inicijative “Osmijeh za osmijeh”**

U OVOM IZDANJU PROČITAJTE:

Obilježen Svjetski dan dječijih prava - Mladi volonteri FTZ dijelili besplatne zagrljaje

Umrežavanje zajednica u općini Tuzla

Ideje građanskog i omladinskog aktivizma za primjer

Rekli su o nama FTZ izbliza

Pripremila: Nela Hukić u saradnji sa osobljem FTZ

Besplatni zagrljaji - Free Hugs



Fotografija za uspomenu volontera Fondacije tuzlanske zajednice

Na Svjetski dan djeteta, 20.11.2009. na šetalištu Korzo, Fondacija tuzlanske zajednice zajedno sa Organizacijom za djecu i mlade Osmijeh za Osmijeh, dram orkestrom OŠ Kreka i TTC Telex-om je organizovala obilježavanje ovog izuzetno značajnog datuma.

Aktivisti TTC Telex su sa djecom organizovali kreativnu radionicu na temu dječijih prava,

dok su volonteri Fondacije tuzlanske zajednice i Organizacije za djecu i mlade Osmijeh za Osmijeh dijelili letke sa UN konvencijom dječijih prava prilagođenu djecu pod nazivom „Da ih i Ti razumiješ“. Pored letaka sa UN konvencijom, volonteri ove dvije organizacije su po prvi puta u Tuzli organizovali dijeljenje Besplatnih zagrljaja svima onima koji su željeli da se zagrlje.

„Na osnovu iskustva u radu sa djecom, mišljenja smo da se djeca ne igraju dovoljno te da zabava, radost, igra i osmijeh trebaju biti sastavni dio odrastanja. Upravo zbog toga je organizovana podjela “Besplatnih zagrljaja“, rekao je Emir Bašić, voditelj programa za mlade u Fondaciji tuzlanske zajednice.

Zerina Brkić, volonterka Fondacije tuzlanske zajednice, o ovoj aktivnosti je rekla:

„Ovo je super! Nikada se nisam više izgrlila kao do sada i nikada do sada nisam učinila toliko ljude sretnim. Zaista mladima i starijima nedostaje više smijeha i pažnje jedni od drugih. Ovo je prava stvar“.

Zbog činjenice da je organizacija ovakvog događaja izazvala kod slučajnih prolaznika mnogo pozitivnog iznenađenja ali i osmijeha, Fondacija tuzlanske zajednice u saradnji sa Organizacijom za djecu i mlade Osmijeh za Osmijeh će učiniti ovu aktivnost tradicionalnom u našem gradu.



Malo se čudili, ali su ideju rado prihvalili :)



Najmlađi bez predrasuda



Besplatni zagrljaji prolaznike nisu ostavljali ravnodušnim



U nedostatku prolaznika grlili se volonteri :)

Projekat organiziranja zajednica

Razmjena iskustava u radu na razvoju zajednica

Fondacija tuzlanske zajednice već drugu godinu za redom, u okviru Programa razvoja zajednice, organizirala je radionicu „Razmjena iskustava u radu na razvoju zajednice“, koja je održana 10.11.2009. u Društvenom domu Gornja Tuzla.

Cilj radionice je bio razmjena iskustava i dobrih praksi između lokalnih grupa za razvoj zajednice sa područja Simin Hana, Gornje Tuzle, Husina, Soline i Tušnja. Radionica je bila otvorenog tipa, pa su pored predstavnika lokalnih grupa za razvoj zajednice, sudjelovali i predstavnici općinskih službi, Doma mladih i drugih društvenih domova sa područja općine Tuzla, OSCE-a, Pedagoškog zavoda, kantonalnog ministarstva za

socijalnu politiku i rad, Međunarodnog Udruženja Interaktivnih otvorenih škola i Udruga Društvo Breščana.

U prezentacijskom dijelu sudionici su imali priliku čuti i vidjeti pozitivna iskustva i dobre prakse iz svih pet zajednica, te uporediti uspjehe i razviti dobre ideje za buduće aktivnosti.

Nakon prezentacijskog dijela implementiranih aktivnosti u zajednici u toku 2009. godine, učesnici radionice su se opredijelili za učešće u jednom od tri debatna stola na teme:

Tema 1: Uloga Povjereničkih odbora mjesnih zajednica u građanskom aktivizmu i razvoju zajednice

Tema 2: Društveni centri kao mjesta okupljanja nevladinih organizacija i grupa u zajednici

Tema 3: Otvorene škole i razvoj zajednice.

Ciljevi svakog od debatnih stolova bili su:

Potaknuti konstruktivni dijalog učesnika i istaći primjere dobrih praksi na osnovu konkretnih iskustava u radu; Aktualizirati probleme i poteškoće u radu, te pokušati definirati systemske korake ka njihovom rješavanju; Uspostaviti saradnju i otvoreni dijalog između aktera radi kvalitetnijeg planiranja aktivnosti u narednom periodu.

U ovoj aktivnosti sudjelovalo je oko 90 osoba. Komentari sudionika su bili jednoglasni u tome da su razmjene ovakvog tipa korisne, te da ih je potrebno održavati mnogo češće.



Učesnici radionice



BLIC VIJESTI

Razmjene iskustava i rad u mrežama

*Dvije predstavnice FTZ sudjelovale su u debatnim stolovima na teme „Uspostavljanje institucionalnih mehanizama saradnje organizacija civilnog društva i lokalnih vlasti“, te „Uloga vršnjačke edukacije u procesu socijalnog uključivanja“ u Doboju 15. i 16. oktobra.

*Dvije predstavnice FTZ i 6 aktera iz lokalnih grupa za razvoj zajednice je sudjelovalo u „Susretima prijateljstva u Dalju“.

*Dvoje predstavnika FTZ je sudjelovalo u Treningu za trenere u Berlinu u okviru YEPP mreže. Uspješno su završili edukaciju iz oblasti javnog zagovaranja u periodu 16.-20. novembar.

Grafički prikaz podržanih inicijativa u 2009

Kroz Program malih grantova pozivamo nezavisne organizacije i udruženja, institucije, škole, klubove, te neformalne grupe građana, da nam se jave sa inovativnim prijedlogom za projekat koji će unaprijediti razvoj i poboljšati uslove življenja u Tuzli.

Posebno želimo stimulirati veću

participaciju svih građana u razvoju zajednice i partnerstvo sa tri sektora u realiziranju projekata za opšte dobro društva.

Svaki podržani projekat se realizira u Tuzli i za dobrobit je njenih građana (mladih i starih), a provodi ga grupa najmanje od 3 do 5 građana Tuzle. Donacije se izdaju u vrijednosti od 100 do 1000 KM, za građanske

inicijative, dok se za inicijative mladih izdaje do 800 KM. Građani obavezno učestvuju u sufinansiranju projekta (50% od ukupne vrijednosti projekta - novčano, materijalno ili kroz volonterski rad), a projekti mogu biti iz različitih oblasti djelovanja: ekologija, kultura, sport, društveni život, obrazovanje,

Grantovi za građanske inicijative

U toku 2009. podržano je ukupno 33 inicijative u iznosu od 26 279,00KM.

Grantovi za inicijative mladih


U toku 2009. podržano je ukupno 22 inicijative omladinska projekta, što iznosi ukupno 11 016,80 KM.

EDUKACIJA, PUTOVANJA I OSNAŽIVANJA MLADIH


Fondacija tuzlanske zajednice pruža svojim volonterima mogućnost neformalne edukacije, putovanja te stvaranja šireg socijalnog kruga.

S tim u vezi neki od volontera su učestvovali na treningu omladinskih banaka u Poljskoj, zatim Međunarodnoj konferenciji volonterizma u Sarajevu, Sajmu NVO-a u Tuzli, treninzima Lokalnog volonterskog servisa, Sajmovima ideja, boravili na kampu u Švedskoj... Ove aktivnosti su, između ostalog, imale za cilj unaprijeđenje metodologije rada, kao i osnaživanje mladih.

Programske oblasti



Programske oblasti podržane kroz program Omladinske banke Tuzla



Podržane ideje za primjer

Svi u čamac! Druženje i sticanje vještina na zabavan način

Raft klub „Vatrogasac“ na bistaračkom jezeru za djecu sa posebnim potrebama organizovao je druženje pod nazivom „Svi u čamac“. U cjelodnevnom programu članovi ovog kluba, zajedno sa članovima Odreda izviđača „Krin“ i Udruženjem „Korak po korak“, organizovali su nekoliko edukativnih aktivnosti: upoznavanje sa rafting opremom i vožnja u raft čamcu, podizanje šatora, spremanje hrane, spašavanje iz vode, te osnovne tehnike gašenja požara.

„Cilj našeg kluba je promocija i afirmisanje rafting sporta, pogotovo među mladima. Međutim, ovoga puta odlučili smo ovaj sport približiti i djeci sa posebnim potrebama, od kojih mnogi čak i ne znaju šta je to, a neki od njih nikada nisu ni bili na jezeru“, kazao je Dino Poljić, predsjednik Raft kluba.

Projekt „Svi u čamac“ organizovan je u dva tematska izleta, a prvi je održan u saradnji sa Udruženjem „Majke hendikepirane djece“. Cijeli projekat, koji je ujedno i prvi zvanični projekat Raft

kluba „Vatrogasac“, kojeg sačinjavaju uposlenici Profesionalne vatrogasne brigade Tuzla, finansijski je podržala Fondacija tuzlanske zajednice.

Jasmin Hadžić je jedan od korisnika Udruženja „Korak po korak“ koji su bili na jezeru Bistarac. Iako mu ovo nije bio prvi odlazak na jezero, vožnja raft čamcem za njega je bila sasvim novo iskustvo. „Postavljao sam šator, vozio sam se u čamcu, veslao sam. Nikad prije nisam radio ove stvari i veoma sam sretan“, kazao je Jasmin.

Izložba fotografija „Crno, bijelo u boji“

U organizaciji Vijeća mladih Gornje Tuzle organizovana je prva međunarodna izložba fotografija pod nazivom „Crno bijelo u boji“.

Cilj projekta je bio skrenuti pažnju na život mladih organizovanjem događaja koji nije baš čest u njihovoj zajednici, te unaprijediti društveni život mladih u zajednici.

Potrebna novčana sredstva obezbijedila je Fondacija tuzlanske zajednice putem poziva za apliciranje na projekte mladih Omladinske banke Tuzla. Nakon objavljenog konkursa za izložbu fotografija, na mail Vijeća stiglo je 75 fotografija za sve tri kategorije.

Pored fotografija aplikovanih sa područja Tuzle, pristigle su fotografije mladih iz Banja Luke i Sombora, što je ovoj manifestaciji dalo karakter regionalne.

Žiri u sastavu Jasenko Valjevac, Zoran Grbić, Ljiljana Galušić i Salih Brkić odlukom je odobrio izlaganje 50 fotografija koje su odgovarale temi (život mladih u tri kategorije) te proglasio i najbolje tri.

Prvo mjesto osvojila je fotografija „The black or the white way“ mlade autorice Mirne Dizdarević iz Tuzle.

Drugoplasirana je fotografija „Pokušaj“ autora Vedrana Haračića, također iz Tuzle.

Dok je treće mjesto pripalo autoru iz Banja Luke, Daliboru Šauli sa fotografijom „Pogledaj dom svoj anđele“.

Pobjednicima su uručene i vrijedne nagrade, 150 KM, 100KM, i 50 KM za prva tri m j e s t a . „Mi smo oduševljeni odzivom posjetilaca kao i fotografijama koje su pristigle, ali i ponosni sobom na organizaciju izložbe“, rekla je Adminka Karić predsjednica Vijeća mladih Gornja Tuzla.



Priprema za plivanje



Vožnja čamcem



Pobjednička fotografija



Drugoplasirana fotografija



Trećeplasirana fotografija

ČLANOVI ODBORA OMLADINSKE BANKE 2009/2010:

Admir Čvalić, Admir Hasanagić, Amina Čeliković, Anton Filipović, Azra Suljić, Belma Šljivjić, Blaženko Stojak, Damir Alibegović, Džani Dervišević, Dženisa Šabanović, Edin Jusufović, Maida Karić, Elvis Cero, Emel Mulamehmedović, Irma Altumbabić, Lejla Šehanović, Mehmed Bujak, Mirsada Tobudić, Nerma Ribić, Selma Fejzić, Selma Ibrahimović i Semir Salihović

KOMISIJA ZA DODJELU GRANTOVA:

Dr. Ekrem Jusufović, predsjedavajući, Asmir Čilimković, član, Mirela Šabanović, članica, Vera Đezić, članica, Zoran Kapetanović, član, Faruk Omanović, član, Marko Kovačević, član, Asja Redžić, članica

„Društvo i individua su, tako, međuzavisni. Jedno duguje svoju egzistenciju drugome. Društvo duguje egzistenciju ljudskoj prirodi i posebno njenom nedostatku samodovoljnosti; individua svoju egzistenciju duguje društvu, pošto nije samodovoljna“, Karl R. Popper

Upoznajte osoblje Fondacije tuzlanske zajednice



Jasmina Mustačević, asistentica na programu Organiziranja zajednice je u Fondaciji tuzlanske zajednice od 2008 godine:

Raditi u nevladinom sektoru znači kontinuirano unositi energiju, dosta optimizma i

vjere u pozitivne promjene koje želite vidjeti i ostvariti realizacijom projektnih aktivnosti. U Fondaciji tuzlanske zajednice sam zaposlena od 2008. godine na programu Organiziranja zajednice, te kroz zadatke koje obavljam imam mogućnost da budem dio aktivizma i kontinuiranih promjena koje nastaju na lokalnom nivou kada se u problemima počne gledati rješenje.

Realizacija projekata koji imaju za cilj motivirati i organizirati građane u zajednicama, te unaprijediti saradnju sa

lokalnim vlastima nije nešto što donosi rezultate nakon kratkog roka, ali je zaisigurno projekat koji stvara dugoročniju korist i čvrstu bazu za dalji razvoj demokratskog društva.

S obzirom da projekat na kojem radim na jedinstven način nastoji zblžiti zajednicu i pojedince, te omogućiti ostvarivanje osnovnih ljudskih prava, dosta mi pomaže i moje prethodno iskustvo i struka. Organiziranje zajednice i animiranje građana ponekad može biti i težak posao, koji pred nas postavlja dosta iskušenja i kontinuiranih borbi, ali je to proces koji je potreban zemlji u tranziciji kao što je naša.

Radom u Fondaciji tuzlanske zajednice imam priliku da vidim dosta pozitivnih akcija u zajednicama, te pružim pomoć aktivistima koji volonterski, sa puno entuzijazma žele da naprave konkretne, vidljive promjene u svom okruženju. Zajednicu zaista čine ljudi, ali i njen razvoj zavisi od njihove spremnosti da se uključe u odlučivanje i realiziraju aktivnosti koje su stvarna potreba. Naš zadatak u zajednicama nije da nametnemo rješenje, već da prepoznamo inicijative, pružimo savjetodavnu, finansijsku ili organizacijsku pomoć kako bi te ideje građana stvorile vidljive promjene.

Građani jesu ti koji najbolje poznaju i prepoznaju probleme u zajednici, te imaju najviše motiva da se uključe u njihovo rješavanje. S obzirom da sam po struci dipl.žurnalista, dosta pažnje tokom svog rada u Fondaciji tuzlanske zajednice stavljam i na promociju, informiranje javnosti o brojnim pozitivnim rezultatima naših aktivista. Na taj način želimo da ostalim zajednicama pokažemo da volonterizam postoji i da su građani zaista svjesni da su oni ti koji imaju pravo i obavezu da se aktivnije uključe u život, razvoj i napredak lokalne zajednice. Da to zaista i djeluje pokazuje i sve veća zainteresovanost građana i veći broj odobrenih projekata i koordiniranih aktivnosti tokom godine. Svaki ostvareni rezultat, zadovoljstvo krajnjih korisnika ili vidljive promjene su stvari koje me ispunjavaju, podstiču, te potvrđuju da zaista pojedinci mogu podstaknuti i kreirati zajedničko dobro u ovom našem BH društvu.

Glavna kancelarija:

Matije Gupca 13, 75000 Tuzla

Tel/Fax: + 387 35 362 830/831

E-mail: fondtz@fondacijatz.org



**Odaberite i Vi
Fondaciju tuzlanske
zajednice za Vašeg
dugoročnog
partnera!**

Kancelarija u Agora centru u Simin Hanu:

Oslobodilaca 4, 75207 Simn Han

Tel/Fax. + 387 35 312 931/930

E-mail agora-otvorenicentar@fondacijatz.org

Fondacija tuzlanske zajednice

O NAMA SU REKLI:

"Definitivno mi znači biti dio Fondacije tuzlanske zajednice zato što sam svjesna da mi je ona pomogla u kreiranju mojih stavova i jačanju mojih kapaciteta. Upoznala sam nove stvari, neke nove ljude. Vidjela sam da me mnoge stvari zanimaju, privlače i da me čine sretnom." Asja Dizdarević, voditeljica radionica.

"Stekla sam puno samopouzdanja, mogu reći da sam i postala bolja osoba. Naučila sam uvažavati tuđa mišljenja i „natjerati“ druge da slušaju moje.", članica Odbora OBT-a.

"Znači mi mnogo biti dio FTZ-a zato što sam u organizaciju u kojoj se uči rad sa mladima ljudima koji su željni znanja, i koji žele da nešto promjene .. da ne sjede i samo čekaju kad će se nešto promijeniti i krenuti na bolje .. koji se bore za sebe i svoje bolje sutra", Amina Selimović, voditeljica radionica.

"Fondacija tuzlanske zajednice nam zaista mnogo pruža podrške kroz različite projekte. Ko bi finansirao ove aktivnosti u zajednici i u školi, kao što su dječije lutkarske predstave?", Zinaida Čolić, pedagogica OŠ Tušanj.

Osoblje

Jasna Jašarević, Izvršna direktorica

Vera Đezić, Finansijski menadžment

Angelina Hodžić, Program koordinatorka

Emir Bašić, Program koordinator

Sabiha Rekić, Koordinatorica Agora centra

Jasmina Mustačević, Program asistentica

Elma Muhamedbegović, Program asistentica

Mirza Čatibušić, Program asistent

Ismet Sokoljanin, Program asistent

Kadir Beganović, Agora centar

Fadila Islamović, Agora centar

Selma Tobudić, Evaluatorica YEPP aktivnosti